

Imaggio dell'editore

N. 18

Presit cun táule dople di músiche fr. 0.80, sençe 0.40

30 Decembar 1933 - XII

ARCHIVI DE LETERATURE FURLANE

ANTIGHE E MÖDERNE



CIALUNI EGICIÀN PUGNÈT
N. STÂI DI MUÈÇ • 1847-1917 •

CHESTE DISPENSE 'E CONTÈN

La mata di bosch , Boçèt di Toni Barbacèit di Prun (dial. di Paluçe)	pag. 90
La biblioteche regionâl furlane	91
Riablilitaçion dal K e l'eterne questìon de gralie	93
Vanzeli di Jesú Crist secont San Mateo . (Recensión).	95
Ciantade dai Crotârs de Crotarie , perâulis dal Cav. L. Grassi e musiche di Carlo Matiüss pag. 166 - 167 (táule dople par zònte)	

Presit fin a la dispense 16 in resòn di 1.25 a la dispense. Del 17 in devánt 0.80 la dispense. I Abonâç son invitâç a mèti-si in règule cul'aministracìon

— UDIN Place Vitorio 9 A —

LA MATA DI BOSCH

Stòria vera suceduda a Zuvièl in Ciargna i ultims agns dal secul passaat.

In chei tims 'a-j disevin che Lúcia di Bosch 'a véva pierduut il ciaaf dauur dal Zocolaar, che jee a lu clamava, e a lu clamá in vita soo, il so 'curisin': — A era incièmò fruta che jee a si inemorá di lui: chest una di ch'-era via par Stalivieri cu-i zòcui a passòn cência malícia, a si tolé qualchi confidença e da in chee di, jee 'no-lu dismenteà plui.

Una fiesta, dopo messa, il Zocolaar a-l-era sul curunúc cun atis di loor 'a vualmaa las puemas ch'as vignivin di glésia; ma quánt che Lúcia a lu vedè, 'a saltá fuur dal trop e a lu lá a bussaa a braç-a-cuel. Al-è staat in chee di un davòl in dùta la vila e dug a'-j vevin ce dii. Il pleván al clamá in canònica Lúcia e il Zocolaar par muni-ju: ma il Zocolaar al diseva che lui nò-l-era colpa e che Lúcia, noma jee, 'a veva voluda e fata ché fota. Lúcia, inveça, 'a è saltada sú a di-j porca áncia al pleván. Jee 'a diseva che chel puém a-l-era il sò mu-roos e che il Signoor a-j-el veva destinaat e che se lui al vess manciaat di peráula, che il Signoor a-nò-l-podeva mai daa-j fortuna. Il pleván a-nò-l-è staat bon di bonaa-la e al scugnè lassaa-la in-t-ál sò saavor. Clamaat da banda il Zocolaar, à'-j disè ch'a nò-l-foss laat dauur di una "biada mata,"

Da in chee di Lúcia - che puur a era una biela puemuçata - passá pa' "mata di Bosch,"

Il Zocolaar al procurava di nò scu-intrà-la e di nò, dá-j plait.

Lúcia, a l'incuintra, 'a si s-cialdava simpri plui, fin quánt che la int a crodeva par da bon, ch' 'a foss daventada mata par lui. Jee 'a lu veva simpri in bòcia e il sò "curisin," al entrava par dut

come il saal in-ta mignestra. Jee 'a-viveva pa'-l so curisin, ma il curisin, a si vergognava di vèj-la: la int a' lu toleva via, e lui, come dug, a' la clamava 'la mata' e al diseva che cu-la mata a nò-l veva nua ce-faa: - Ma Lúcia 'a nò crodeva e 'a faseva di dut par tirà-se-l dóngia. 'A si meté in-t-ál chiaaf di faa un zardín, a-d-ulà che secònt jee 'a veva di ciatà-si cu-l sò curisin a faa l'amoor. E iù sott Ronchcialins fuur di una rovisata, plena di claps e di sterps, dan-t-i dauur di e not e contentan'-si, come ch'a diseva jee, di un uuf in di cuét in-tà fiéra dal la-voor, dopo qualchi mees 'a podé faa una s-ciala di orts - dulà che dopo, ben s'intint, a la buina di Diu, 'a semenava radích e fasui.

Al-era un ciantòn di tantas roobas ma cência né chiaaf né coda.

In-ta soo ciasa, una biada ciasa cu-viarta di strangh, e cu-l stai viért e dut neri di cialín, a si vedeva un banción dóngia il fuugh, una grátula, una scugiela, scuarnada, e una rimina. - Il gialinaar in-t-al ciantòn da's brús-cias. Dóngia, in-t-una stançata nera nera e scura come una bòcia di louf, Lúcia 'a veva il sò cagnaar; e in-tál freet e in-ta's gurtias di fuur, un bìaat brovadaar cência brovadíns, al diseva che a-i denti nò-nd-era ati che misèria.

Ce mut ch' 'a vivèss ché disgraciada a nò si capiva. Plui tart quánt ch' 'a era un pouc plui vècia 'a si inzeugnava a trai las ciarta e tang di loor ai vegnivin, da lontàn a sinti-la e trose ai diseva ch' 'a indovinava dut. Cert al-è che jee a nò las mandave a dii.

Qualchi volta a vegniva sú in plaça e come ch' 'a vess vuut di ciataa da dii cun dug a vosava che il sò curisin al-la veva bandonata e ch' 'a nò-l-podeva vè furtuna. "Al tolarà, 'a diseva, una fèmina e a'-j murirá neada -; al tolarà un'ata e

'a murirà brusada e 'a nò-l vorà prola -;
e chel plevanât cāusa di dug i miei maai,
quánt che al scloparà al vegnarà neri
come il cuul di una cialdèria e la soo
anemata 'a sarà puartada vie dal giall
a cavalòt da tampiesta, in mieç dai tons
e dai lamps ch'ai fasarân trimaa la ciera..

A lu disè nò una volta, ma par un
grum di agns a ripetè simpri chee solfa.
E sí che par-bio, il Zocolaar al lá in
Todèsh e al meté sú famea, ma la fè-
mina a-i muri dopo qualchi mees, neada;
al 'vè un'ata, e chesta a-i muri brusada
e éncia il plevàn, dopo muárt di un colp,
al vegnì neri e quánt ch' 'a si fasè il
funeraal, al pareva che il giall al vess
dis-ciadènaat il mont.

Ma il Zocolaar al-era lontán lontán
e a nò-l pensava a' "mata," che simpri a
lu veva in-t-ai voi e in-ta-l cuur.

A-j son cinquanta agns ch'al suce-
deva ches.

Jo frut inciemò, mi riguardi come
ch'al foss voi, una dí la Mata di Bosch
in plaça, duta spasimada, 'a vosava e 'a
berlava, e che tanta int a era a sintii-la.
Jee a diseva:

"La malediçion di Diu, pa-l tradiit
gno curisín, 'a vegnarà su-la ciera. J
viodarees, dopo ch'j sarai muarta da un
pièç, i ciárs a laa cència ciavai e la int
a laa pa-l'aria - ma 'l-om ch'al crodarà
di iessi plui di Diu, - plui nò-l crodarà
a Diu e 'a vegnarà una gran vuera, mai
plui veduda e nissún vorà ati né paas,
né ben..

La Mata di Bosch 'a é muarta un
grum prima che i ciárs a'j lassin cència
ciavai e che la int 'a lass pa-l'aria, ma
ch'a seti par ciastígh di Diu o par atas
róubas, dopo vee indovinaat la stòria
da-l Zocolaar e chee da-l plevàn, fin
cumò, la biada Mata di Bosch, ha indo-
vinaat éncia la vuera e la stòrie che nou
j stin passànt.

Lúcia, che Diu aj déi la buina rèquia, 'a è
muarta.

Cumò la sò calopa e dut in tór al è voltaat.
Ai sot a resta noma di Bosch la fantanuta.
Ch'a cor imò e 'a dis la veretaat!

Rin di Paluçà

TONI BARBACÉIT

La biblioteche regionâl Furlane

E' son dôs qualitâç di bibliotechis
públichis: *Popolârs* di istruzion, passe-
tîmp e amene leture e di *Culture*, di studi
e consultaçion stòriche e scientifiche.

Lis primis dovaressin sei in ogni
famee, in ogni quartîr di citât o borgh,
in ogni comùn, fraçion o borgade ('t-ai
nestris pais tantis quantis e' son lis glé-
siis grandis e piçulis) e magari dulà che
vîv une comunitât di personis (scuele,
colégio, ufiçi, ospedâl, ricòvero, presòn...).
Nò costin capitâi, 'e baste une scansie e
une persone che, in une determinade
ore, si presti a distrubui i libris.

Pe's secondis ocorin granc capitâi,
locâi, personâl sciêlt e ben paiât; nò cate
dut ches, chêi che lis doprin e' ciata-
rán che nò-l-è mai dut chel che brama-
ressin. Di cheste sorte di bibliotechis il
Friûl nò-l podará mai sperâ di 'vênt
plui di une e di grâcie chê, e cheste a
scugue servî dute la region furlane. E
mentre chês de prime categorie podarán
sei multiplicadis, de seconde spèce nò
podará esisti che une sole e in cheste e'
scugnin concentrâ-si dutis lis risorsis
destinadis o da destinâ-si a ches scopo.

La biblioteche comunâl di Udin 'e
jê chê che si preste plui di dutis a de-
ventâ biblioteche ragonâl furlane e se
si ûl ance clamâ-le, naçionâl ladine, pe'
importançe che ha al dí di ué e pe' so
posiçion centrâl dal pont di viste geo-
grafich e des stradis di comunicaçion

Al presint jé miste val-a-di par un quart o un quint jé di istruçion e amene leture, par tre quarc e plui di culture superiôr e di studis storichs - scientifichs.

I studiôs di dute la regiòn e' han la stesse necessitât di consultâ cheste biblioteche quindi duc e' scugin nel istess grâd contribuî al so mantenimènt e increment. I abitânc de citât e' son favurîc de sô presince, quindi par resón di justicie il Común de citât sede de biblioteche al dovarèss compensâ chest vantâc cu-l furni locâi, personâl o almanco custode, lûs e ris-cialdamènt, e i studiôs di altris comúns sence distincion, podê vè i libris ad-imprèst, (cu-lis dovudis garançis) e, scuginnd vignî 'te capitâl par esclusive resón di studi, gioldi viâc, alògio e spese a pûr presit di cost. Idee cheste ritignude al dí ué utopistiche ma nò impussiqil a efetuâ-si, e in relaçion a lis premissis fatis.

La biblioteche di Udin 'e coste ai 67000 abitânc dal Común franchs 49.000 ad an, nome par personâl (22.000) e dotaçion (27.000), val-a-di 77 çentesins a ogni abitânt.

Metín che p'e sole biblioteche di culture storiche-scentifiche ogni abitânt al spindi 50 çentesins. Sicome lis dôs provincis di Udin e Guriçe e' contin un miliòn e 40 mîl ánimis, 't-è facil stabili la sume che sarèss destinade a cheste istituçion se duc i comúns spindessin 'te stesse proporçion di chel di Udin; par une úniche biblioteche centrâl.

Se cheste idee fantástiche si metèss, par un dí, in prátiche, a la biblioteche furlane, dopo qualchi an, e' scugnaressin tirâ jú il ciapièl ance lis análoghis istituçions fondadis dai miliardaris de Mèriche.

Nò bisugne dismenteâ che somând ai 193 000 slovèns dal Guriçán i 30-35.000 dal Udinès, al risulterà che plui di un quint de popolaçion regionâl 'e ha par

mari-lenghe la slovene e che ance a cheste bisugnarèss concedi la part che j tòcie. E' vivin par prionte plui di une ventesime part di abitânc di lenghe todès-ce che nò puedin sei dal dut trascurâc se si ûl procedi cun justicie distributive rigorose. Cu-i cent e plui mîl franchs ad an de contribuçion di ches-c si podarèss alimentâ in Guriçe une bieie biblioteche slovene e todes-ce se la perâule d'ordin nò foss chê di neâ ogni culture ai alògenos d'Italie. Epûr quàn' che si fevele di Malte nò si dopre il stess pês e la stesse misure che si use a ciase nestre e si pretínd che i Maltès che son di lenghe árabe, e' vedin dirit a 'vê l'insegnamènt e doprà il talián!

Si va disint che il Comun di Udin 'l-ha un debit di cirche 40 miliòns, ma si po' subit azonzi che nò-l si ha ciárt indebitât fin sore i vôi par sustignî la biblioteche.

Chêi 50 centesins che si domandaressin a ogni abitânt par an e che puedin parè une tasse fuarte, nò rapresentin che doi numars di "Gazetín", che durin pocis oris e mièc o un quârt, di bilgèt di entrade in teatro od al cine ai puès-c plui popolârs. Epûr il probleme al restará sence soluçion forsit par simpri.

E culí al ven a tir di rivelâ che la leture 'e jé il divertimènt plui economic che al existi, anci al-è afât di bant quàn' che jé fate su-i libris de's bibliotechis públichis, divertimènt che al corispuínt a chel di gioldi la músiche in place quàn' che sune la bande comunâl pe quâl i municipis e' spindin plui che p'es bibliotechis. (85.000 ad an costave fin al '28 la soprimude bande di Udin).

Il teatro e il cine, a pensâ-j ben, al rapresente un incoragiamènt a la poltronarie umane che jé ogni dí plui generâl e profonde. Infati chês dôs istituçions nò tindin che a fâ sparagnâ la fadie di

lêi une comédie o un racònt e di rapresentâ cu-l'imaginâcion ce che si lêi. Dut il progrèss mecanich nò-l tind, in fin dai conç, che a fâ sparagnâ seciadis e fadie al-omp che, land^o indenânt in cheste maniere, al deventarâ la bèstie plui indolente di dut il creât. Un biel risultât !

Riabilitaçion^o dal **K**

l'eterne questìon^o de grafie

A l'Acadèmie di Fantarie e di Cavalarie di Mòdane, si fâs une gran fieste, a la quâl partècipe dute la citadinançe, 'te zornade in cui e' mancin cent dis ai alievos di chê scuele militâr, prim di ricevi lis spalinis di sototenente.

Par l'ocasiòn si è stampade chestan une cartuline ilustrade a colòrs che puarte il titul: **Mak II 100** che si dovarèss scrivi e lêi *mach pi cent* e che, tradòt dal dialèt piamontès, al-ûl di: *Dome plui cent*. Il *k* e il *p* grech son mitûç come une reminiscençe de's lètaris dopradis in matemátiche, il *k* ance come alusiòn a la lenghe serbo - croate che si studie cun fervôr in chê scuele, insieme al francês, in previsiòn di scugnî ròmpi-le prin o dopo cu-i dòl pòpui cunfinànç.

Si impare ance da cheste frase che la tradiçion piamontese 'e dure ta-l esercit ancimò dopo almanco 70 ajns che chest 'l-è deventât talián e che son passadis dôs generaciòns. 'E bastarèss la persistençe di cheste frase, traplantade sence motiv fûr dal so ambiént originâl, par sbandi da ogni ciâf ch'al-è su-lis spalìs, la pretese che lenghis milenáriis, come il furlán, il slovèn e dutis lis altris che son rapresentadis in Itálie da grandis o pículis comunitâç e feveladis in provinciis intèriis come il furlán

il slovèn, il croát, il todèsch, o in distrèt e sempliç comúns come il francês, il serbo-croát ('ta-l' Italie meridionâl) l'albanès, il grèch, il rumèn, il catalán, e' puedin vignî bandonadis par abraçâ esclusivamentri il talián.

Prime de uere si ere sbandît il francês dall'insegnamènt in Val d'Aoste, (dulá che al viveve in scuele e in glésie da sècui), cu-l risultât che i zovins, che jerin in trincee, nò savevin corispuindi cu-la famee né par francês né par talián. Il medésim risultat si va otignínd a carriere cu-i sudiç taliáns di lenghe slave e todes-ce. Nò-l-è ciárt un progrèss par uari la plae dal-analfabetismo che va in cancrene.

Cheste anade jé caratarizade dal-ostracismo dal lengaç furlán da la *Vita Cattolica* e da *Vita Isontina* che pubblicave vilotis classificadis par argo ènt e da altris sfueis. La Filològiche no jé stade sciolte zachê la presidençe di chê societât, tignude dal ex ministro Prof. Leicht, 'e presente vonde garançie che nò sgarará di un pèl fûr dal programe di assolût naçionalismo talián. Curiòs po' che mentre ogni giornâl slovèn o croat l'è sbandît, e forsit al ven fûr nome un giornalût in lengaç todèsch ispirât dal guviâr, il Curir dè Puglie di Bari al púbbliche un ediciòn par albanès. Pículis contradiciòns che nome ai guviârs fuárç e' son permitudis.

Si tòlare ancemò il *Stroligh* che del rest 'l-è perfetamentri mugnestri e che al fâs l'efièt de durmiole su ogni sentiment che nò-l sei afât ortodóss.

Da un pâr di mès duc i predìs dal distrèt di S. Pieri son stâç obleâç a sotoscrivi une declaraçion cu-la quâl si impegnavin a nò prediciâ né a fâ dutrine altri che par talián. Pur sotoscrivínd, han fate la riserve che spietavin l'ordin del lôr superiôr, l'Arçivescul. Sicome in pro-

vinçe di Guriçe il sloven 'l-ha tradiçions secolârs nò si è par cumò vûd corâgio di fâ anâloghe imposiçion a chel clero ma un pôch a la volte, se nò-l gambie aiar, si rivarà ance a chest.

In conclusion la uere 'e ha pejorât par dut la condiçion di culture des minorancis.

Neând la lôr mari-lenghe a Todèsch e Slâvs che son dentri dai confins dal Regno, cemût si pued-j-al sustigni i diric de lenghe Italiane a Malte che in realtât 'e ha par lengaç indigeno un dialèt arab?

Sul *Gazetlin* fra il 13 e il 16 di Maj si è let che il Prof. Livio Rodaro di Martignâ 'l-è stât denunciât par' vè fat tirâ vie dal cimiteri une epigrafe ritignude ofensive p-e memòrie dal pari fate meti da un altri fi invece di chê che lui al veve detât par furlân e che il Plévan al si è rifiudad di dâ-le.

Cui ch'al'vivarà al viodarà de's brutis ciossis p'e questiôn des lenghis e de culture. E di che al esist un rimiedi 'te lenghe internacionâl neutrâl.

In quant al *k*, cheste consonant 'e jè un vèr sècie-mirindis che parât fûr p'e puarte, al torne a jentrâ p'e fignestre.

Infati, mentre al ven esigliât e al fûi squintiât da ches-c pûars stampâc inconcludenç, al jentrarà trionfalmenti 't-al-atlante linguistich taliân - ladin ch'al formarà un'òpare monumentâl la cui preparaçion e publicaçion 'e costarà centenârs di miârs di franchs e aj volará un'ete prin di sei completade.

Se chêi tâi, che, sot l'ispiraçion dal guviâr de defonte monarchie a doi ciâfs, han ciapade sù la abitudin al spionagio — "spiis da l'Austrie," come si diseve dai fruç dopo il sessantessis, — e' vessin viarte la plui elementâr enciclopedie, e' varessin imparât che il *k* l'esist 't-ai plui antîchs alfabèç, val-a-di 't-al *cretês*, 't-al *fenicio* 't-al *etrûsch* 't-al *osco*, 't-al *venet-*

eugâneo, 't-al *latîn* e 't-al *grêch arcaichs e classichs*.

Da l'alfabèt grêch 'l-è passât in chêt des lenghis slavis, nel mentre l'alfabèt todèsch 'l-ha avût origine 't-al perîodo de decadençe da l-impero român.

L'academich d'Italie Laurinç Perosi al dopre il *k* par scrivi il taliân; par stampâ il furlân lu dopre Benigno Morâss di Cerciuvint e qualchi altri di chêt che nò si compuartin come pioris, ma che nò han pôre di rômpi-le cu-la tradiçion quan'che si trate di progredi.

Marmul Guriçân, convinçût che occorin lêtaris di pueste par rapresentâ il *c* dûr e chel palatâl, *s* e *z* sonoro e sord, e che i Furlâns benpensânç, par pore di sei ciapâc par Todèschs o par Slovêns, nò uelin savê-nt nè di *k* nè di pipis, al-hà nujemanco che mudificadis lêtaris di forme tradiçional in maniere di fâ-lis ciapâ un gnûf valôr, e cun chestis 'l-ha stampât il *Vocabolario Integrativo Friulano*, dimostrând di nò badâ a sacrificis par sciolzi un probleme capitâl, mentre altris han pretendût di sciolzi-lu diventând lurids spiôs e insultând.

Za 70 - 80 aîs si son stampâc libris di conversaçion di taliân par stranîrs in cui la pronunçie figurade taliane jere otignude cu-l *k*. In chêt tîmps nissûn 'l-ha protestât e tant manco fatis iusinuaçions e ditis insolencis! Di-band nò si è in tîmps di progress! Ma, za che o' sîn su-l-eterno argoment de grafie furlane si presente l'ocasiôn di tocîa un altri tast:

Confessin che la grafie adotade dal-Archivi j'è une vore berdeade par cui che al scrîv, cui ch'al compòn tipograficamentri e cui che al corêz, zachê squasi ogni perâule 'e ha acént tonich e indicaçion di vocâls lungis, viartis o siaradis, liniute che mostre l'uniôn di une vôs enclitiche (o sençe acént) a

une peràule acentade, o apòstrofo che al ûl indicà che une vocâl 'e mance. ('vè - avè; 't-al - in-t-âl; 'l-il, lu; 'l-la) Cheste dificolât jê però compensade da ches-c vantâç: che il letôr al lêi sençe dificolât parcè nò-l-hà che di pronuncia chel che 'l-è rapresentât graficamentri e, di plui, al ven a cognosi ju elemench de's peràulis che si pronunçin unidis; e chel che nò-l cognòsc a perfeçion la lenghe la viôd scomponude 't-ai siei elemench il cui significât lu ciate su-l vocabulari: Par esempi lis peràulis scritis: *cal, nol, int, nond, sunt, cui, cul*, e' deventin claris se scritis *ch'al, nò-'l, in-t, nò-nd, sun-t, cu'-i cu'-l*, e quàn' che si sepi che il *t*, qualchi volte *d*, o *j*, e' son mitûç 't-e peràule par resòn di enfemismo. Cussì vegnûn spiegadis facilmentri lis vòs non sèmplicis: *se-j-al, cun-t-ùn, par-òm-p, no-nd-è, no-nd-j-è, dis-j-al, salùdt-lu, ciò-li-lis, cialai'-sì, puartâ-ur, 'vê-nt, d-ulà, biel-zà, biel-auâl, ce-mût, in-d-ulà, ecc.*

Considerànt lis lenghis europeis si note che a'nd-è di chès privis di acenç, apòstrosfos come latin, inglès, todèsch; di chès cun pocissims acenç come il romànco; altris cun discret numar di ches-c segnos diacritichs come francès, spagnûl portoghès, taliàn; chest ultim però al tind par òpare di qualchi scritôr a vigni simpri plui sparnicât di acenç, e finalmentri di chès cun acenç o lètariis diacritichis squasi in ogni peràule come il grèch, lis lenghis slavis, e ance il furlàn scrit cu-l sisteme adotât da 'l'Archivi.

Si è criticât une vore 'l-Esperanto che l-adòte lètariis cu-i ciapelûç. 'Tal numar di decembar 1933 dal *Cosmoglotta* 'l-è stât stampât un articul in Esperanto sençe doprà nissune lètare cu-i ciapelûç. Qualunque esperantiste che nò-l sei un principiànt al pò lêi perfetamentri e capi come se chès lètariis esistessin. Jo soi persuadût che al sucèdarès altretant par

ogni lenghe che vigniss stampade o scrite sençe nissûn segno diacritich, che ben s'intind da part di chêi che la cognoscin ben.

'O voi plui in là disint che si otignarèss l'istèss ance ne-l-italiàn ometind nò dome duc i apòstrosfos e i acenç ma ance lassànd fûr lis doplis, il *g* in *gl* e *gn* e il *c* in *sc*. Chestis indicaçions meticolosis e' restin indispensàbilis nome par determinà il valor dës peràulis isoladis. 'T-une frase o miôr 't-un perìodo nò-'l pò sucedi sgâmbio di significâç. Se si adotassin lis semplificaçions indicadis ce tant plui facil che al sarèss scrivi sençe sbàlgios lis rispetivis lenghis.

In ogni mûd simpri plui convenienc i doi estrèms che nò une vie di mièç, che nò ha nissun vantâç. Il sisteme adotât 'ta-l-Archivi efetivamentri al-è plui in armonie cu-la tendence che si ha atualmentri da qualchi autôr 't-e grafie taliane. Epûr si veve fat sençe pâr tanc sècul!

Vanzeli di Jesù Crist

secònt San Mateo

L-è publicât da Pieri Zampe, contadin-stampadôr di Predemân. La publicaçion di chest elegànt volumût 'e dovarèss fâ èpuche zachè da squasi mièç secul nò si stampe in Friûl nissûn libri di religiòn 't-e lenghe dal popul, e quindi, voc o nò, de gran majorance de's famèis.

No cate chest i giornai catolichs nò han dedicât a l-avenimènt altri che qualchi riute insignificànt e par fuarçe o probailmentri par complasè revisôr e stampadôr. E si che chel libri al dovarèss sei let e comentât in ogni famee!

Un seguâç di altre religiòn al notarèss che la Glésie catòliche si òcupe soredût di celebrâ teatralmentri i avvenimench de vite dal Redentôr, ma chel che si riferisc a la vere dutrine rivoluzionarie da-l Nazarèn al va in seconde o tiarce linie. Varin dirit di clamâ-si cristiàns nome quàn' ch'al sucèdarà dut l'incontrari.

BIBLIOTECHE DE L'ARCHIVI, N. 1

Gnovis vilotis e variânc di chês publicadis 't-al Tesaur - consideraçions su-la Uere Mondial e su-l Friûl sot la talpe todes-ce. — Ediziòn di 80 esemplârs di 750 pag. cun cuviartine ilustrade — *Presl 18 franchs*

Pátrie Ladine Vol. I. pag. 280 di cui 40 a stampe e ilustradis Fr. 12
" " Vol. II. Prospetive delle industrie turistiche nel Friuli, p. 906 " 27
" " Vol. III. L'Atlante linguistico italiano con un saggio di atlante emiliano-romagnolo di quasi 100 carte, pag. 112 " 6
Ediziòn in autografie di 80 còpiis — I tre volúms nò si vendin separatamenti

Tesaur de lenghe furlane - 5 fascicui in quârt di fisse autografie pag. 826. Da pag. 552 a pag. 783 si han 4493 vilotis furlanis cu-lis variânc.

'Ta-l'òpare e' son conprindudis 16 páginis di músiche furlane incise che contegnin composiziòns di Zardín e di altris, il Stroligh furlán di Zorût pa-l 1921, un fasciculút di 72 páginis in cui si confronte il vocabulari furlán cun chel dal provençâl, une ciarte geográfiche dal Friûl a la s-ciale di 1 : 200.000 di un metro par 0.76, e une linguístiche di dute la Ladinie a la s-ciale di 1 : 600.000

Presi complessiv franchs 57 - Ediziòn di 80 còpiis - I fascicui nò si vendin separâc

Sentimenti ed affetti nella poesia popolare friulana - 2 fascicui a stampe Fr. 6

Si ricevin prenotaçions a chëstis ôparis manoscritis in quatri esemplars :

Il quatri novembar. Drame in cinch ats dei quai son stâc publicâc doi che puedin stâ ance bessoi. — *Pàginis 83 che comprendin i doi ats.*

Leterature populâr proibide. Volúm che a-lè rivât a 476 páginis e al contén 700 barzaletis ultragrassis.

Poesiis populârs dai Slovens cisalpíns cun traduçion interlineâr in lenghe internaçionâl Esperanto. — Volúm rivât a 350 páginis che al contén cirche 850 componiménç in part inediç, e che 'l-è rivât dome a mièç.

Ches-c tre libris e' son manoscric in quatri còpiis; une a pene e tre cun ciarte a ciarbòn. — Páginis dal formât di cm. 22 x 28.

Preši a la págine de copie a pene 0.60 fr. Prime copie a ciarte-ciarbòn 0.60, seconde 0.50, tiarce 0.20.

Rivolzi-si a l'Aministraciòn da-'l-Archivi - Udin, Place Vitòrio Em. 9 A

Gerènt responsabil A. Tilín

— Stabilimènt Tipo - Litografich BEPO TABÀCH — Sandenêl dal Friûl —